

Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu, Inatsisartut inatsisissaattut siunnersuut nr. x xx 2013-imeersoq.
(Naalakkersuisut)

Akissuteqaat

(Peqqissutsimut Naalakkersuisioq Agathe Fontain)

Aappassaaneerineq

Tarnimikkut nappaatilinnik nammineersinnaajunnaarsitsineq allatigullu pinngitsaaliisummik iliuuseqarneq pillugu, Inatsisartut inatsisissaattut siunnersuutip annertuumik tapserneqarnera pillugu, Ilaqtariinnermut Peqqissutsimullu Ataatsimiitaliaq Naalakkersuisut sinnerlugit qutsavigissavara.

Partiit tamakkerlutik tassalu, inatsisissatut siunnersummi tarnimikkut nappaatillit nammineersinnaajunnaarsinneqartut allatigullu pinngitsaaliisummik iliuuseqarfingineqartut, inatsisitigut inisisimanerisa patajaallisarneqarnissaanik ersarissarneqarnissaanillu siunnersuutip kinguneqartitsisussatut isigimmassuk, Naalakkersuisut nuannaarutigaat.

Inatsisissatut siunnersuutip arlalinnik pisortatigoortunik aalajangersagaqarnera Peqqissutsimut Ataatsimiitaliap maluginiarpa. Tamatumunnga atatillugu qaqugu taakku suliarineqarnissaat, maannamullu inatsisitigut maleruagassat sutigut allaassuteqarnissaat apeqqutigalugu. Inatsisissatut siunnersummut atatillugu atuutsineqalersussanik arfineq marluk missaannik nalunaarusiortoqarnissa ilisimatitsissutigineqassaaq. Nalunaarutit suleriaasissamut maleruagassanik pisariaqartitanik arlalinnik- inatsisitigut toqqammavissanik inatsisilornermut tunngasutigut suliaqarnissamut immersuuisussanik- imaqarput. Immikkoortut Nalunaarutini pineqartut tunngaviusumik siornatigut aalajangersaavigineqarsimannigillat. Taamaakkaluartoq pinngitsaaliisummik iliuuseqarneq ullumikkut pissusioreersut naapertorlugit tamatumunnga nalunaarsuvimmut nalunarsugassaapput, taamatuttaaq pinngitsaaliisummik iliuuseqarnerit Nunatsinni Nakosaanermut nalunaarutigineqartarlutik.

Inatsisissatut siunnersummi napparsimasunik siunnersuisartussatut taaneqartut piaartumik pissarsiariniarneqartariaqarnerat, Peqqissutsimut Ataatsimiitaliap tikkuarpaa. Tamatumunnga atatillugu taakku inatsisissatut siunnersuutip atuutsinnejalernissaanut piffissaq naammaginartoq sioqqullugu pissarsiarineqarnissaat ilisimatitsissutigineqassaaq. Napparsimasunik siunnersuisartunik atorfinititsinissamut atatillugu taakku pitsaanerpaamik siunnersuisinnaaneq anguniarlugu illugiinnik kalaallisut qallunaatullu oqaaseqartuuissaat pingartinneqassaaq. Napparsimasup oqaatsit ilitsoqqussaai assersuutigalugu araberisujupata imaluunniit thailandimiut oqaaserippatigik, pisariaqartitsineq naapertorlugu nutserisoqarnissaq peqqinnissaqarfiup isumagissavaa.

Siunnersummi § 30 naapertorlugu ukiut tamaasa nammineersinnaajunnaarsitsinerit allatigullu pinngitsaaliisummik iliuuseqarnerit pillugit tamanut paassisutissanik kinaassutsimik isertuussisunik tunniussisoqartarnissaanut immikkut maleruagassiorqarnissa Peqqissutsimut Ataatsimiitaliap inassutigaa. Tamatumunnga atatillugu ataatsimiitaliaq paassisutissanut saqqummiunneqarnissaat kissaatigineqartunut assersuusiorpoq.

Nunatsinni Nakorsaaneqarfiup inatsisisatut siunnersuusiornerup kingorna pinngitsaaliisummik iliuuseqarneq pillugu naatsorsueqqissaarnikkut kisitsisinik nalunaarsukkanillu suliaqarnissamik piumaffigineqarnera, tamatumunnga atatillugu ilisimatitsissutigineqassaaq. Taamaasilluni pinngitsaaliisummik iliuuseqarnermut tunngatillugu paasissutissanik katersineq sukumiisoq pitsaassutsimillu ilisimaarinnittooq, pinngitsaaliisummik iliuuseqarnernik nakkutilliinermut annertuumik pingaaruteqarpoq. Nunatsinni Nakorsaaneqarfittaaq Tarnimikkut Nappaatillit Maalaarutaannik Aalajangiisartunut allatseqarfiuneq tunngavigalugu, Aalajangiisartut suliaat pillugit ukiumoortumik nalunaarusiortarnissaanik piumaffigineqarpoq. Naatsorsueqqissaarnermi kisitsisit taaneqartut, naatsorsuinerit, ukiumoortumillu nalunaarusiat paasissutissanik Peqqissutsimut Ataatsimiititaliamit kissaatigineqartunik imaqassapput, kikkunillu tamanit takuneqarsinnaassallutik.

Tamatuma saniatigut sulisut tarnimikkut nappaatilinnit nakuuserfigineqartarnerisa nalunaarsorneqarlutillu tamanut saqqummiunneqarnissaasa siunertamut naleqquutunissaa, Ataatsimiititaliap oqaatigaa. Tamatumunnga atatillugu Dronning Ingridip Napparsimavissuani tarnikkut nappaatilinnut immikkoortortaqaqfimmi sulisut napparsimasunit saassunneqartarnerisa nalunaarsorneqartuarnerat ilisimatitsissutigineqassaaq.

Tamatuma saniatigut Dronning Ingridip Napparsimavissuani tarnimikkut nappaatilinnut immikkoortortaqaqfip allilerlugulu nutarterneqarnissaanut pilersaarutit, maannamut sulisoqarnikkut aalajangersakkat ilinniagaqassuserlu tunngavigalugu politikkikkut anguniakkat pillugit nassuaat ilanggullugu paasissutissinneqarnissi Peqqissutsimut Ataatsimiititaliap kissaatigaa.

Dronning Ingridip Napparsimavissuata allilerlugulu aaqqissuuteqqinnejarnissaa pillugu januaari qaammat 2007-imi pilersaarusiami, kingorna iliuusissatut siunniussani aningaasaliisuttissatullu pilersaarummi 2012-imeersumi nutarterneqartumi, tarnimikkut nappaatilinnut immikkoortortamik nutaamik, napparsimasunut akunnittarfimmut nutaamut tapiliussamik sanasoqarnissaata innersuussutaanera, ilisimatitsissutigineqassaartaaq. Taamaasierneq napparsimavissuup immikkoortortaasa uninngaviusut nakorsiartitsiviillu nutarterneqarnissaanut periarfissiissaq tarnimikkullu nappaatilinnik sullissineq ullutsinnut naapertuutunngortinnejassalluni. Tarnimikkut nappaatilinnut sullissivissamik pisariaqartitsineq katillugu 1,393 m² –nik annertussuseqartussatut naatsorsugaavoq- uninngasunut 13-inik siniffeqassalluni, nakorsiartitsiveqassalluni, immikkut nakutillivimmik immikkoortortaqaqassalluni, pillorissaaveqassalluni allafeqassallunilu. Sanaartornissamut aningaasartutissat Naalakkersuisut missingersuutaanni Akiitsunut Aningaasaliinernullu periusissamut imm. 5.3-mut nalunaarutigineqarput.

Sulisoqarnermut tunngatillugu peqqinnissaqarfimmi aningaasarsiat tunngavigalugit aqutseriaatsip atorneqarnera maannalu makku pilersaarutigineqarnerat ilisimatitsissutigineqarsinnaavoq:

- Immikkoortortap pisortai (immikkoortortami nakorsat pisortaat peqqissaasuunerlu)
- Sinerissami nakorsaqarnikkut kiffartuussisussat ilanggulligit, nakorsat tarpip nappaataanik immikkut ilisimasallit arfinillit
- Peqqissaanermik suliallit 18-it (peqqissaasut, sundhedsassistentillu)
- Tarpip pissusaanik immikkut ilisimasallit sisamat
- Pillorissaasut sisamat
- Allatsit pingasut
- Inunniq isumaginninnermi siunnersortit pingasut
- Oqalutsi ataaseq
- Nakorsiartitsivik tallimanik sulisulik (najukkami tarnimikkut nappaatilinnik sullissivik)

Tarnimikkut nappaatilinnik sullisisut pillugit ilinniagaqassuseq tunngavigalugu politikkimi anguniagassatut siunniussat – Naalakkersuisut paasisaat naapertorlugu -apeqquut taanna tarnimikkut nappaatilinnut pinngitsaaliisummik iliuuseqarfingineqartunut tunngassuteqarpoq pinngitsaaliisummillu iliuuseqarnerup sapinngisaq tamaat qajassuartuunissaanut attuumassuteqarluni. Ineriartortitsinermut atatillugu iliuuserisanut allanut tunngasuni, tarnikku nappaatilinnik katsorsaaneq pillugu nassuaat innersuussutigineqassaaq. Tamatumunnga atatillugu peqqinnissaqarfiup ukiup aappa qeqqa matuma siorna, aaqqiagiinnginnerit iliuuseqarfingisinnaanerat pillugu siunnerfilimmik pikkorissaanernik aallartitsisimanera ilisimatitsissutigineqassaaq. Aaqqiagiinnginnerit iliuuseqarfingisinnaanerat pillugu pikkorissaaneq siulleq decemberi qaammat 2011 ingerlanneqarpoq. Tamatuma malitsigisaanik apriili qaammat 2012, sulilerlaanik aaqqiagiinnginnerit iliuuseqarfingisinnaanerat pillugu pikkorissaasoqaqippoq, tamanullu nangitsinermik malitseqartinneqarluni. Inatsisissatut siunnersuutip atuutsinnejalerneranut atatillugu, maleruagassat nutaat sulisunut ilinniartitsissutigineqarnissaat aallartisarneqassaaq.

Inatsisip tunngaviusup iluani isumalluutinik atuinerup tamakkerlugu immikkut ersersinnejarnissaa, taamaasillunilu siunnersuutip aningaasaqarnermut kingunerisassaatut nassuaammut assersuunnejarsinnaanngorsinnaanissaa, Peqqissutsimut Ataatsimiititaliap innersuussutigaattaaq. Tamatumunnga atatillugu peqqinnissaqarfiup aningaasartuutissatut missingersuusiornermi, isumalluutinik atuineq pineqartoq ersersillugu aaqqissuussiniarnera ilisimatitsissutigineqassaaq.

Naalakkersuisut taama oqaaseqaateqarlutik siunnersuut Inatsisartuni akuersaartumik oqaluuserisassanngorlugu tunniuppaat.